

QUÆSTIONES ANNO 1864

COLLATIONIBUS THEOLOGICIS

In Archidiœcesi Quebecensi Discutiendæ.

MENSE JANUARIO.

Sempronius parochus in archidiœcesi Quebecensi, non habens facultatem absolvendi a reservatis, Petrum absolvit a crimine publici et notorii concubinatûs. Paucis post acceptam absolutionem diebus elapsis, Petrus, urgente tentatione contrâ fidem, heresim formalem scribit nullo teste, et statim peccati pœnitens et fidei sincerum actum eliciens, chartam in ignem projicit et ad Sempronium vadit, a quo absolutionem cum lacrymis petit et obtinet. Quæritur :

- 1°. Quid circâ casus reservatos in hæc archidiœcesi et circâ eorum absolutionem ?
- 2°. Quid in specie circâ absolutionem sive privatam, sive publicam ab heresi ?
- 3°. An valeant absolutiones Petro concessæ et quid nunc agendum ?
- 4°. An Sempronius aliquam pœnam incurrerit ?

Caius missionarius duo tantum sacra paramenta ad missam celebrandam secum affert, unum flavum vel multicolorum, quo utitur diebus quibus rubrica præscribit colorem album, vel rubrum, vel viridem; alterum verò violaceum quod adhibet in adventu et quadragesimâ et in missis defunctorum. Quæritur :

- 1°. An rubrica de colore paramentorum obliget sub gravi, vel sub levi ?
- 2°. An liceat uti colore flavo loco aliorum, vel habere paramentum multicolorum ?
- 3°. An possit missa *de requiem* celebrari cum paramentis violaceis ?

MENSE MAIO.

Sempronius neo-presbyter, in parochiæ S. . . possessionem nuper ingressus vicinos parochos adit et consulit circâ plura quæ ad quotidianam praxim attinent. Hæc autem comperit :

Caius ardentissimo zelo flagrat contrâ novas quasdam muliebres vestes quas immodestas reputat. In concionibus frequentissimè insurgit contrâ feminas quæ ampla vestimenta, vulgo *crinolines*, vel fasciolas (*rubans*), vel rotunda capitis operimenta (*chapeaux ronds*) induunt. Absolutionem denegat, etiam tempore paschali, puellis quæ his rebus utuntur et matribus quæ id permittunt. Quando

feminæ illæ, ab aliis sacerdotibus absolutæ, ad sacram synaxin accedunt, prætermittit eas in distributione S. Eucharistiæ, et hoc agit etiam in alienâ parochiâ.

Terentius contrariam tenet praxim. Rarò de iis vestibus loquitur et solummodo ad exhortandos fideles ut iis abstineant. Absolutionem denegat tantum in iis casibus in quibus comperit adesse manifestam indecentiam. Et quadam die celebrans in parochia Caii, communionem tribuit euidam feminæ quam Caius paulo ante prætermiserat in distributione S. Eucharistiæ.

Hinc anxius Sempronius quærit :

- 1°. Quid sanxerint leges ecclesiæ circa vestes muliebres ?
- 2°. An possit parochus pro libitu suis parochianis quidquam prohibere sub pœna denegationis sacramentorum ?
- 3°. Quid de agendi ratione Caii et Terentii ?

Deficiente aqua baptismali, Sempronius parochus hujus archidiocesis, novam conficit utendo formula brevi à Pio Papa VIII approbata ad usum Missionariorum Americæ septentrionalis, quæ invenitur in appendice compendio ritualis romani ad usum provincie Quebecensis, pag. 244.

Quæritur utrum potius debuisset uti formula longiori quæ in rituali nostro legitur pag. 52 ?

MENSE JULIO.

Titius olim per aliquot menses medicinæ studuit in Universitate, deinde militiæ sacræ nomen dedit et factus est presbyter et parochus. Parochianis suis et aliis remedia consulit et ex charitate etiam pauperibus gratuito distribuit, a divitibus spontè oblata munera accipit. Quadam autem die medicus, qui in hac parochiâ artem suam exercet, declarat Sergium ægrotum morituum esse si remedia a Titio commendata adhuc beat, quia sunt contraria principiis communiter receptis. Altera die evenit ut Caius febri laborans obiret statim post sumptum remedium a Titio commendatum.

His commotus cœpit Titius plurimum sui temporis medicinæ studio impendere ut talia pericula in futurum averteret. Duobus annis elapsis, cum exercitiis spiritualibus vacaret, comperit se nuper errasse evidenter circa duas constitutiones quarum unam indebitam imposuerat, et ab altera debita pœnitentem absolverat.

Tunc confessarium adit et ab eo quærit :

- 1°. Quid sanxerint leges ecclesiasticæ circa exercitium medicinæ et chirurgiæ a clericis ?
- 2°. Annon irregularis factus sit ?
- 3°. An teneatur ad reparationem damni propter erroneas decisiones illati ?
- 4°. Annon convenientius tempus suum consumeret in studio theologiæ quàm medicinæ ?

Caius capellanus monialium in archidiocesi Quebecensi, media nocte Nativitatis Domini Nostri Jesu Christi missam privatam celebrat in qua sacram communionem tribuit monialibus. Hac missa finita discedunt moniales et dicitur statim secunda missa ab eodem capellano, coram paucis tantum monialibus quæ priori assistere non potuerunt, quibus datur sacra communio. Insuper Caius pro tribus missis hujus festi tria accipit stipendia. Quæritur :

1°. An liceat privatam missam celebrare media nocte Nativitatis D. N. J. C?

2°. An liceat in hac diocesi, sacram communionem tribuere in secunda missa, quando sic dicitur immediatè post missam in nocte?

3°. An possit sacerdos tria stipendia accipere pro tribus missis ejusdem festi?

MENSE OCTOBRI.

Marcus sacerdos, sacris missionibus addictus, in magna populi frequentia sacramentales confessiones excipiens, incidit in Sergium divitem mercatorem, alacri ingenio præditum, qui, cum per plures annos inter mercatores protestantes et incredulos fuerit versatus, plura contra veritatem catholicæ fidei audivit. Is in confessione manifestavit se aliquantum de præcipiis christianæ religionis mysteriis dubitare, parochum suum interrogasse, qui nunquam potuit demonstrare, Ecclesiam cui factam esse revelationem asserunt, et quæ hæc dogmata docet, infallibilem esse. In temporis angustiis in quibus versatur Marcus, satis esse putat ad absolutionem conferendam a Sergio accipere eum paratum esse omne dubium abjicere de religionis mysteriis, ubi primum sibi evidenter fuerit demonstratum ea dogmata a Deo ipso esse revelata. Quapropter Marcus sibi assumens opportuniore tempore Sergium docere, eum absolvit. Haud multo post de hac sua agendi ratione scrupulis agitatus theologum adit, a quo quærit :

1°. Quenam sit fidei theologiæ natura?

2°. Quid de sua agendi ratione sentiendum?

3°. Quid modo agendum?

Caius presbyter innixus verbis missalis quibus dicitur *Præparatio ad missam pro opportunitate sacerdotis facienda*, omissis prorsus præparationis precibus solet statim paramenta sumere, nisi aliâ de causâ sibi expectandum sit antè celebrationem; imo quotiès se præbet occasio, sermones non necessarios habet dum se induit sacris vestibus, quas proindè einè respectivis precibus sumit. Post missam revertens ab altari ad sacristiam vel nullam recitat orationem vel dicit *Te Deum*. Quæritur igitur :

1°. Utrùm adsit ulla obligatio recitandi preces in missali pro præparatione assignatas sive in toto, sive ex parte?

2°. An peceaverit Caius omittendo preces quæ assignantur dicendæ in sumptione paramentorum?

3°. An et quando dici debeant post missam preces in missali assignatæ pro gratiarum actione?